



**BOSNA I HERCEGOVINA
FEDERACIJA BOSNE I HERCEGOVINE
URED ZA REVIZIJU INSTITUCIJA U FBIH
SARAJEVO**

Ložionička 3, 71000 Sarajevo, Tel: + 387 (0)33 723 550, Fax: 716 400, www. vrifbih.ba, e-mail: urrevfed@bih.net.ba, vrifbih@vrifbih.ba

IZVJEŠTAJ O REVIZJI FINANSIJSKIH IZVJEŠTAJA

FEDERALNOG MINISTARSTVA PRAVDE

ZA 2009.GODINU

Broj: 03-18 /10

Sarajevo, mart 2010. godine

**Menadžmentu
FEDERALNOG MINISTARSTVA PRAVDE**

NEZAVISNO REVIZORSKO MIŠLJENJE

Osnova za reviziju

Izvršili smo reviziju finansijskih izvještaja **Federalnog ministarstva pravde** (u daljem tekstu: Ministarstva) za 2009. godinu (bilansa stanja na dan 31. decembar 2009. godine i odgovarajućeg računa prihoda i rashoda, izvještaja o izvršenju budžeta za godinu koja se završava na taj dan), te reviziju usklađenosti poslovanja sa važećim zakonskim i drugim relevantnim propisima i pregleda značajnih računovodstvenih politika i drugih napomena uz finansijske izvještaje.

Odgovornost rukovodstva

Rukovodstvo Ministarstva odgovorno je za izradu i fer prezentaciju finansijskih izvještaja u skladu sa posebnim propisima u Federaciji o računovodstvu i finansijskom obavještavanju u javnom sektoru. Ova odgovornost obuhvata: kreiranje, primjenu i održavanje internih kontrola koje su relevantne za pripremu i fer prezentaciju finansijskih izvještaja koji ne sadrže materijalno značajne pogrešne iskaze nastale usljed korupcije i prevare, odabir i primjenu odgovarajućih računovodstvenih politika i računovodstvene procjene koje su razumne u datim okolnostima. Rukovodstvo je takođe odgovorno za usklađenost poslovanja Ministarstva sa važećim zakonskim i drugim relevantnim propisima.

Odgovornost revizora

Naša je odgovornost da izrazimo mišljenje o finansijskim izvještajima na osnovu provedene revizije. Reviziju smo izvršili u skladu sa Zakonom o reviziji institucija u FBiH ("Sl. novine FBiH", broj 22/06), INTOSAI revizijskim standardima i Međunarodnim standardima revizije. Ovi standardi nalažu da radimo u skladu sa etičkim zahtjevima i da reviziju planiramo i izvršimo na način koji omogućava da se, u razumnoj mjeri, uvjerimo da finansijski izvještaji ne sadrže materijalno značajne pogrešne iskaze, te da je poslovanje usklađeno sa važećim zakonskim i drugim relevantnim propisima.

Revizija uključuje sprovođenje postupaka u cilju pribavljanja revizorskih dokaza o usklađenosti poslovanja i o iznosima i objelodanjivanjima datim u finansijskim izvještajima. Izbor postupka je zasnovan na revizorskom prosuđivanju, uključujući procjenu rizika materijalno značajnih pogrešnih iskaza u finansijskim izvještajima. Prilikom procjene rizika, revizor razmatra interne kontrole koje su relevantne za pripremu i fer prezentaciju finansijskih izvještaja, u cilju odabira revizorskih postupaka koji su odgovarajući u datim okolnostima, ali ne u cilju izražavanja odvojenog mišljenja o efektivnosti internih kontrola. Revizija takođe uključuje ocjenu primijenjenih računovodstvenih politika i značajnih procjena izvršenih od strane rukovodstva, kao i ocjenu opšte prezentacije finansijskih izvještaja.

Smatramo da su pribavljeni revizorski dokazi dovoljni i odgovarajući i da obezbjeđuju osnovu za naše revizorsko mišljenje.

Kvalifikacija:

- 1. Ne možemo potvrditi da je isplata naknada za rad tehničkim licima u komisijama u neto iznosu od 53.677 KM (bruto iznos 63.380 KM) izvršena u skladu sa zakonskim propisima kojima je predviđeno pravo na naknadu članovima komisije, iz razloga što tehničko osoblje po istim ne ostvaruje pravo na naknadu, odnosno obzirom da je predviđeno da administrativno tehničke poslove obavlja Ministarstvo (tačka 5.4.1 Izvještaja);**
- 2. Opravdanost isplate dijela izdataka po osnovu ugovora o djelu u neto iznosu od 20.850 KM (bruto iznos 24.622 KM) ne možemo potvrditi iz razloga što su zaključeni za izvršenje onih poslova koji predstavljaju redovne poslove i zadatke uposlenih koji su utvrđeni Pravilnikom o unutrašnjoj organizaciji i sistematizaciji Ministarstva (tačka 5.4.1. Izvještaja);**

3. Nabavka dijela kompjuterske opreme u iznosu od 93.512 KM nije izvršena u skladu sa Zakonom o javnim nabavkama BiH u dijelu provođenja odgovarajućeg postupka za dodjelu ugovora. Također se ne može potvrditi opravdanost plaćanja nabavljene kompjuterske opreme u iznosu od 138.137 KM iz razloga što je isplata izvršena prije ugovorenog roka, a isti je bio jedan od kriterija za izbor najpovoljnijeg ponuđača (tačka 5.6. Izvještaja).

Mišljenje

Po našem mišljenju, osim za navedeno u prethodnom pasusu, finansijski izvještaji Federalnog ministarstva pravde, po svim bitnim pitanjima prikazuju istinito i objektivno stanje imovine i obaveza na dan 31.12.2009. godine, rezultate poslovanja i izvršenja budžeta, za godinu koja se završava na taj dan, u skladu sa prihvaćenim okvirom finansijskog izvještavanja tj. Uredbom o računovodstvu budžeta u FBiH i Pravilnikom o finansijskom izvještavanju i godišnjem obračunu budžeta u FBiH.

Finansijsko poslovanje Ministarstva u toku 2009. godine, osim za napomene navedene u tačkama 1. i 3. u prethodnom pasusu, je bilo u svim materijalno značajnim aspektima usklađeno sa važećom zakonskom regulativom.

Sarajevo: 26.03.2010. godine

Zamjenik generalnog revizora

Branko Kolobarić, dipl. oec.

Generalni revizor

Dr. sc. Ibrahim Okanović, dipl. oec.



SADRŽAJ

1. UVOD	1
2. PREDMET, CILJ I OBIM REVIZIJE	1
3. REZIME	1
4. OSVRT NA PREPORUKE REVIZIJE ZA 2008. GODINU	3
5. NALAZI I PREPORUKE	3
5.1 Sistem internih kontrola	3
5.2 Obavljanje poslova iz nadležnosti Ministarstva.....	4
5.3 Budžet za 2009. godinu	5
5.4 Tekući rashodi	5
5.4.1 Izdaci za materijal i usluge	5
5.5 Tekući transferi	7
5.6 Primjena Zakona o javnim nabavkama BiH.....	8
5.7 Razvojni projekti	8
6. KOMENTAR	9
PRILOG BR. 1	1
Izvršenje budžeta Federalnog ministarstva pravde na dan 31.12.2009. godine.....	1

IZVJEŠTAJ
O OBAVLJENOJ REVIZIJI FINANSIJSKIH IZVJEŠTAJA
FEDERALNOG MINISTARSTVA PRAVDE
za 2009. godinu

1. UVOD

Federalno ministarstvo pravde osnovano je u skladu sa Zakonom o federalnim ministarstvima i drugim tijelima federalne uprave. Ministarstvo obavlja upravne, stručne i druge poslove utvrđene zakonom u oblastima pravosudnih institucija i uprave; upravnog nadzora nad radom pravosudne uprave i federalnih tijela uprave; pružanje pomoći u edukaciji sudija i tužilaca; udruživanje u političke organizacije i udruženja građana; oblast kancelarijskog poslovanja; upravni nadzor i izvršenje krivičnih sankcija. Ministarstvo vrši i upravne poslove koji ne spadaju u djelokrug drugih organa uprave Federacije.

U sastavu Ministarstva nalazi se Zavod za javnu upravu, koji vrši stručne i druge poslove koji se odnose na: utvrđivanje unutrašnje organizacije federalnih ministarstava i drugih tijela federalne uprave sa ciljem da se unaprijedi njihov rad i organizacija te osigura efikasno rukovođenje; uređivanje načina ostvarivanja prava i dužnosti službenika i namještenika iz radnih odnosa, plaća i drugih naknada u općim aktima ministarstava i drugih tijela federalne uprave; organizovanje stručnog obrazovanja i usavršavanja službenika i druge poslove vezane za oblast javne uprave.

Pravilnikom o unutrašnjoj organizaciji Ministarstva, za izvršenje poslova i zadataka predviđeno je ukupno 34 radna mjesta (iz nadležnosti Ministarstva 31 i Zavoda 3) sa ukupno 48 izvršilaca. Budžetom FBiH za 2009. godinu sredstva su odobrena za 44, a na dan 31.12.2009. godine radio je 41 zaposlenik.

Sjedište Ministarstva je u Sarajevu, u ulici Valtera Perića broj 15.

2. PREDMET, CILJ I OBIM REVIZIJE

Predmet revizije su finansijski izvještaji Ministarstva za 2009. godinu i usklađenost poslovanja sa važećim zakonskim i drugim relevantnim propisima. Iako se u Ministarstvu obavljaju finansijski i računovodstveni poslovi i sačinjava zbirni finansijski izvještaj za kazneno popravne zavode, predmet ove revizije nije zbirni finansijski izvještaj kazneno popravnih zavoda.

Cilj revizije finansijskih izvještaja je da omogući revizoru da izrazi mišljenje o finansijskim izvještajima koji su predmet revizije, tj. da li finansijski izvještaji, u materijalno značajnom smislu, objektivno i istinito prikazuju finansijsko i materijalno stanje Ministarstva na dan 31.12.2009. godine, izvršenje budžeta za godinu koja se završava na taj dan, da li je poslovanje usklađeno sa važećim zakonskim i drugim relevantnim propisima, da li je trošenje javnih sredstava namjensko, te da li su finansijski izvještaji sačinjeni u skladu sa posebnim propisima o računovodstvu i finansijskom izvještavanju u javnom sektoru.

Revizija je obavljena u skladu sa internim planskim dokumentima revizije, u periodu od decembra 2009. godine do marta 2010. godine.

S obzirom da se revizija obavlja ispitivanjem na bazi uzorka i da postoje inherentna ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške mogu ostati neotkrivene.

3. REZIME

Izvršenom revizijom poslovanja za 2009. godinu konstatovali smo određen broj propusta i nepravilnosti, a u cilju otklanjanja istih dali smo slijedeće preporuke:

Planiranje budžeta vršiti u skladu sa Instrukcijama Federalnog ministarstva finansija, a na osnovu relevantnih parametara i opravdanih potreba za sredstvima, u cilju što efikasnije upotrebe odobrenih sredstava uz uvažavanje ograničenja ukupne javne potrošnje.

Potrebno je u saradnji sa Federalnim ministarstvom finansija poduzeti aktivnosti u cilju planiranja i odobravanja budžeta za svaki kazneno popravni zavod kao posebnih federalnih ustanova, koje imaju svojstvo pravnog lica u skladu sa Zakonom o budžetima u FBiH. Odobravanjem budžeta od strane zakonodavnog organa, Parlamenta FBiH, za svaki kazneno popravni zavod kao posebnog budžetskog korisnika utvrdila bi se odgovornost rukovodilaca ovih ustanova za namjensko raspolaganje odobrenim sredstvima.

Potrebno je poduzeti dodatne aktivnosti u cilju naplate zaostalih potraživanja u iznosu od 3.132.610 KM, (od kojih se na 2009. godinu odnosi 988.430 KM) po osnovu fakturiranih troškova izvršenja mjere pritvora i izvršenja kazne zatvora, koje za potrebe kazneno popravnih zavoda vrši Ministarstvo.

Potrebno je aktima koje donosi Ministarstvo na osnovu posebnih zakonskih i podzakonskih propisa, vezano za imenovanje članova komisija za polaganje ispita jasno definisati način i postupak izbora članova komisija iz reda stručnjaka koji su se dokazali svojim naučnim i stručnim radom iz oblasti u koju se imenuju.

Potrebno je preispitati opravdanost formiranja komisija za obavljanje onih poslova koji su po aktima Ministarstva predviđeni kao poslovi i zadaci uposlenih, u cilju izbjegavanja isplate dvostruke naknade i to naknade po osnovu izvršenja obaveza preuzetih rasporedom na to radno mjesto i naknade koja se ostvaruje izvršenjem tih poslova kroz komisiju.

Potrebno je da se administrativno tehnički poslovi za rad komisija za koje je nadležno Ministarstvo, kao i isplata naknada za obavljanje istih vrši u skladu sa zakonskim i ostalim propisima.

Ugovore o djelu zaključivati za izvršenje onih poslova koji u skladu sa Pravilnikom o unutrašnjoj organizaciji nisu utvrđeni kao redovni poslovi i zadaci Ministarstva, a za izvršenje redovnih poslova provoditi procedure utvrđene Zakonom o državnoj službi u FBiH i Zakonom o namještenicima u organima državne službe u FBiH.

Potrebno je izvršiti uvid u dokumentaciju vezano za nabavku i prodaju Priručnika za polaganje ispita općeg znanja za državne službenike u organima državne službe, utvrditi zalihe istih na dan 31.12.2009. godine i u skladu sa konstatovanim poduzeti aktivnosti u skladu sa zakonskim i ostalim propisima.

Potrebno je da Ministarstvo u okviru vršenja svoje nadležnosti – nadzora nad tijelima federalne, uprave inicira donošenje i izdavanje potrebnih priručnika, a odabir autora vršiti u skladu sa prethodno donesenim procedurama i na transparentan način.

Postupak nabavke opreme vršiti u skladu sa Zakonom o javnim nabavkama BiH u dijelu izbora odgovarajućeg postupka za dodjelu ugovora. Također potrebno je da se plaćanje nabavljene opreme vrši u skladu sa zaključenim ugovorima, koji su u skladu sa uslovima utvrđenim u tenderskoj dokumentaciji.

Plan nabavke sačinjavati u skladu sa Pravilnikom o javnim nabavkama Federalnog ministarstva pravde i kazneno popravnih zavoda, sa precizno utvrđenim vrstama i osnovnim obilježjima svakog od predmeta nabavke i plaćanje nabavke vršiti u skladu sa ugovorenim odnosom.

Potrebno je unutar Ministarstva organizovati Jedinicu za implementaciju projekata Svjetske banke i imenovati osobu uposlenu u Ministarstvu da upravlja istom u skladu sa Uredbom o dopuni Uredbe o uspostavi koordinacionog mehanizma za upravljanje i koordiniranje sredstava za razvoj u FBiH i Odlukom o osnivanju Jedinice za implementaciju Projekta Svjetske banke za zemljišno-knjižnu administraciju u Federalnom ministarstvu pravde.

Potrebno je osigurati dosljednu primjenu svih pisanih procedura i pravila, kao i praćenje sistema internih kontrola, radi prilagođavanja i unaprjeđenja samog sistema internih kontrola poslovanja.

Potrebno je da Ministarstvo u skladu sa Odlukom Vlade FBiH o odobravanju izdvajanja sredstava iz Budžeta FBiH za 2009. godinu za finansiranje četiri kulturna društva izvrši kontrolu namjenskog utroška sredstava doznačenih u skladu sa navedenom odlukom.

4. OSVRT NA PREPORUKE REVIZIJE ZA 2008. GODINU

Na osnovu izvršene revizije finansijskih izvještaja za 2009. godinu, konstatovali smo da **Ministarstvo nije postupilo po preporukama** koje se odnose na:

- planiranje budžeta za kazneno popravne zavode, kao posebnih federalnih ustanova za izvršenje krivičnih sankcija i dalje se ne vrši u skladu sa Zakonom o budžetima u FBiH,
- planiranje sredstava Ministarstva ne vrši se na osnovu relevantnih parametara i opravdanih potreba, a u cilju što efikasnije upotrebe odobrenih sredstava,
- za potraživanja po osnovu fakturisanih troškova izvršenja mjera pritvora i izvršenja kazne zatvora koje za potrebe kazneno popravnih zavoda vrši Ministarstvo nisu poduzete adekvatne mjere,
- nisu poduzete aktivnosti utvrđivanja opravdanosti korištenja osobnih vozila u službene svrhe, obzirom da su i u 2009. godini korištena sopstvena vozila za službene svrhe,
- donošenje akata na osnovu posebnih zakonskih i pod zakonskih propisa vezano za imenovanje članova komisija za polaganje ispita kojima se jasno definiše način i postupak izbora članova komisija iz reda stručnjaka koji su se dokazali svojim naučnim i stručnim radom iz oblasti u koju se imenuju,
- nije formirana jedinica za implementaciju projekta Svjetske banke i nije imenovana osoba za rukovoditelja jedinice iz reda uposlenih u Ministarstvu.

Preporuke koje su ispoštovane odnose se na:

- utvrđivanje visine sredstava koji se od uplaćenih sredstava od kandidata za polaganje ispita odnosi na naknadu članovima komisije i iznosa koji se odnosi na troškove koje snosi Ministarstvo,
- Pravilnikom o internim kontrolama i internim kontrolnim postupcima definisani su upravljački, administrativni, računovodstveni kontrolni postupci, postupci procjene rizika, informisanja, komunikacije i monitoringa,
- izvršeno je ocjenjivanje državnih službenika i namještenika u skladu sa zakonskim i pod zakonskim aktima,
- izvršena je kontrola namjenskog utroška sredstava za finansiranje četiri kulturna društva po osnovu izdvojenih sredstava iz Budžeta za 2008. godinu i izvršeno je izvještavanje o istom u odnosu na Federalno ministarstvo finansija,
- imenovanje i isplata naknada zaposlenicima za rad u komisijama vršeni su u skladu sa Odlukom o načinu obrazovanja i visini naknade za rad radnih tijela osnovanih od strane Vlade FBiH i rukovoditelja federalnih organa državne službe, samo za poslove koji nisu redovni poslovi Ministarstva i koji se obavljaju poslije redovnog radnog vremena,
- obračun i isplata dnevnica za službena putovanja savjetnika vršena je u skladu sa Uredbom o naknadama troškova za službena putovanja.

5. NALAZI I PREPORUKE

5.1 Sistem internih kontrola

Izvršena je procjena funkcionisanja sistema internih kontrola kako bi se uvjerali da li uspostavljene interne kontrole osiguravaju tačnu i potpunu računovodstvenu evidenciju, potpunu primjenu i usklađenost sa zakonima i propisima, pouzdanost finansijskog izvještavanja, ekonomično, efikasno i efektivno trošenje i zaštitu javnog novca.

Odgovornost za uspostavljanje i primjenu sistema internih kontrola je na rukovodstvu Ministarstva. Pravilnik o unutrašnjoj organizaciji čini osnovni i najvažniji pisani akt sistema internih kontrola, koji je donesen u ožujku 2009. godine. Istim je definisana organizaciona struktura i ovlaštenja svakog zaposlenog unutar organizacije. Kada je u pitanju postavljenje određenih državnih službenika na utvrđena radna mjesta,

isti nije izvršen u potpunosti u skladu sa navedenim Pravilnikom. Konstatovali smo da državni službenik koji je rješenjem raspoređen na radno mjesto stručnog saradnika za izdavačku djelatnost u Zavodu, iste poslove ne obavlja već obavlja poslove tehničkog sekretara u Kabinetu ministra, a poslovi tog radnog mjesta obavljaju se angažovanjem izvršilaca po osnovu ugovora o djelu, što smo konstatirali i revizijom finansijskih izvještaja za 2008. godinu.

Pravilnikom o internim kontrolama i internim kontrolnim postupcima Ministarstvo je definisalo upravljačke, administrativne, računovodstvene interne kontrolne postupke, postupke procjene rizika, postupke informisanja, postupke komunikacije i postupke nadgledanja u skladu sa Smjernicama za uspostavu i jačanje interne kontrole kod budžetskih korisnika u cilju osiguranja izvršenja poslova koji su im zakonom i drugim propisima dati u nadležnost. Međutim, nakon obavljene revizije ne može se potvrditi da je u potpunosti uspostavljen funkcionalni sistem internih kontrola imajući u vidu da je pored navedenih propusta u ovom izvještaju, utvrđeno je da se pojedine kontrolne aktivnosti ne provode na način kako je definisano donesenim procedurama kod korištenja službenih putničkih automobila, obračuna troškova dnevnica, korištenja sredstava za reprezentaciju, korištenja ličnih vozila u službene svrhe, troškova za specijalizaciju i školovanje, kao i evidentiranja izdataka na odgovarajućim pozicijama u skladu sa Pravilnikom o knjigovodstvu budžeta u FBiH i Uredbom o naknadama troškova za službena putovanja.

Potrebno je osigurati dosljednu primjenu svih pisanih procedura i pravila, kao i praćenje sistema internih kontrola, radi prilagođavanja i unaprjeđenja samog sistema internih kontrola poslovanja.

5.2 Obavljanje poslova iz nadležnosti Ministarstva

U skladu sa Zakonom o izvršenju krivičnih sankcija u FBiH kazneno popravni zavodi su posebne federalne ustanove za izvršenje krivičnih sankcija i iste se trebaju organizovati u skladu sa Zakonom o organizaciji organa uprave u FBiH. Također, navedenim Zakonom je utvrđeno da se sredstva za rad svakog kazneno popravnog zavoda osiguravaju u federalnom budžetu u skladu sa Zakonom o budžetima u FBiH.

Međutim, kada je u pitanju osiguranje sredstava za rad kazneno popravnih zavoda, dokumentacija potvrđuje suprotno, odnosno Ministarstvo sačinjava budžetski zahtjev za sredstvima za sve kazneno popravne zavode u jednom iznosu, a po osnovu njihovih prijedloga finansijskih planova i isti dostavlja Federalnom ministarstvu finansija. Budžet za pet kazneno popravnih zavoda odobrava se od strane Parlamenta FBiH, za jednog budžetskog korisnika (kao da je u pitanju jedno pravno lice), a u stvari radi se o većem broju pravnih lica. Usvajanjem budžeta od strane Parlamenta FBiH, Ministarstvo nakon toga odobrava budžet za svaki kazneno popravni zavod posebno, po osnovu kriterija koje isto samo donosi, a rukovodeći se brojem uposlenih u kazneno popravnim zavodima i baze ostvarenja prethodne godine, kao i procenta broja osuđenih i pritvorenih osoba.

Ovaj budžet predstavlja finansijski plan za rad svakog kazneno popravnog zavoda. Na osnovu istog za fiskalnu godinu kazneno popravni zavodi sačinjavaju svoje finansijske izvještaje i iste dostavljaju nadležnim institucijama i agencijama.

Pored planiranja budžeta, Ministarstvo je preuzelo obavezu i izvještavanja o izvršenju budžeta za kazneno popravne zavode i obavezu fakturisanja troškova izvršenja mjere pritvora i izvršenja kazne zatvora po osnovu zaključenih ugovora sa pojedinim kantonalnim vladama. Obavljanjem navedenih poslova neosnovano se izvršavaju prava i obaveze drugih pravnih subjekata a za što nema zakonske niti ugovorne podloge, što za posljedicu može imati validnost ispostavljenih svih dokumenata između ostalih i ispostavljenih faktura. Po ovom osnovu u 2009. godini Ministarstvo je fakturisalo 4.003.640 KM od čega je ostalo ne naplaćeno 988.430 KM. Na dan 31.12.2009. godine ukupna potraživanja po navedenom osnovu su iznosila 3.132.610 KM (od čega se na potraživanja od 2001. do 2008. godine odnosi 2.144.180 KM). Najveći iznosi potraživanja odnose se na potraživanja za kazneno popravni zavod Mostar 1.758.825 KM, Bihac 785.512 KM, Tuzla 224.150 KM, Sarajevo 194.917 KM, Orašje 158.670 KM,

Naglasit ćemo da je uloga Ministarstva u odnosu na kazneno popravne zavode uređena Zakonom o izvršenju krivičnih sankcija u FBiH i ona obuhvata samo vršenje nadzora nad radom izvršenja kazni zatvora, koji obuhvata zakonito i pravilno postupanje sa osuđenim osobama, nadzor nad organizovanjem i radom ustanova, stanje sigurnosti i samo zaštite, funkcionisanja službe osiguranja, a koji se provodi posredstvom ovlaštenih radnika (inspektora) Ministarstva, dok obavljanje svih ostalih poslova, između ostalih planiranje i trošenje budžetskih sredstava kazneno popravnih zavoda je u njihovoj nadležnosti.

Potrebno je u saradnji sa Federalnim ministarstvom finansija poduzeti aktivnosti u cilju planiranja i odobravanja budžeta za svaki kazneno popravni zavod kao posebnih federalnih ustanova, koje imaju svojstvo pravnog lica u skladu sa Zakonom o budžetima u FBiH. Odobravanjem budžeta od strane zakonodavnog organa, Parlamenta FBiH, za svaki kazneno popravni zavod kao posebnog budžetskog korisnika utvrdila bi se odgovornost rukovodilaca ovih ustanova za namjensko raspolaganje odobrenim sredstvima.

Potrebno je poduzeti dodatne aktivnosti u cilju naplate zaostalih potraživanja u iznosu od 3.132.610 KM, (od kojih se na 2009. godinu odnosi 988.430 KM) po osnovu fakturiranih troškova izvršenja mjere pritvora i izvršenja kazne zatvora, koje za potrebe kazneno popravnih zavoda vrši Ministarstvo.

5.3 Budžet za 2009. godinu

Izvršenje Budžeta Ministarstva za 2009. godinu iskazano je od 3.474.616 KM, što u odnosu na odobrena sredstva u iznosu od 4.151.909 KM (Budžet 2.919.969 KM, tekuća rezerva 1.131.940 KM i preraspodjela sa budžetskih korisnika 100.000 KM) predstavlja realizaciju od 84%. Navedeno ukazuje, na što smo ukazali i revizijom finansijskih izvještaja za prethodnu godinu, na nerealno planiranje budžeta Ministarstva.

Pregled izvršenja budžeta dat je u prilogu br. 1 Izvještaja.

Planiranje budžeta vršiti u skladu sa Instrukcijama Federalnog ministarstva finansija, a na osnovu relevantnih parametara i opravdanih potreba za sredstvima, u cilju što efikasnije upotrebe odobrenih sredstava uz uvažavanje ograničenja ukupne javne potrošnje.

5.4 Tekući rashodi

5.4.1 Izdaci za materijal i usluge

Ugovorene usluge iskazane su u iznosu od 977.680 KM, a u strukturi istih najveću stavku predstavljaju troškovi po osnovu naknada za rad komisija u neto iznosu od 753.649 KM (bruto iznos od 889.190 KM).

Izdaci po osnovu ugovora o djelu iskazani su u iznosu od 79.708 KM, a sa pripadajućim porezima 93.089 KM. Najveća stavka navedenih izdataka od 40.000 KM (bruto iznos 46.358 KM), što predstavlja više od 50% od iskazanog iznosa, odnosi se na isplatu naknade za izradu Priručnika za polaganje ispita općeg znanja za državne službenike u organima državne službe. Za izradu navedenog priručnika angažovana su četiri izvršioca putem zaključivanja ugovora o autorskom djelu. Iako je Odlukom Ministarstva o tiskanju Priručnika za polaganje ispita općeg znanja za državne službenike u organima državne službe u FBiH bio određen način izbora, prikupljanjem relevantnih informacija o najkvalificiranijim osobama, nije prezentirana dokumentacija kojom bi se to potvrdilo. Za izradu priručnika, dva autora (uposlenici ministarstva) primili su neto naknadu po 12.000 KM (ukupno 24.000 KM) dok su druga dva autora primila naknadu po 8.000 KM (ukupno 16.000 KM). Ugovori o autorskom djelu zaključeni su 20.03.2009. godine (sa ugovorenim isplatom 15 dana od dana potpisivanja ugovora), a konačan tekst priručnika dostavljen je 30.03.2009. godine. Ugovore je zaključilo Ministarstvo iako se ispit općeg znanja za državne službenike obavlja pred Agencijom za državnu službu FBiH po programu utvrđenom Uredbom Vlade FBiH u uvjetima, načinu i programu polaganja općeg znanja za državne službenike u tijelima Državne službe u FBiH. Ne može se potvrditi opravdanost izrade navedenog priručnika, koji u sadržajnom dijelu čini zbir svih zakonskih propisa iz oblasti, koje su po programu predmet polaganja kod Agencije za državnu službu FBiH, niti je izražena potreba za istim od strane Agencije.

Prema prezentiranoj dokumentaciji odštampano je 700 primjeraka od čega je Ministarstvo preuzelo 200 a 500 primjeraka je predato za dalju distribuciju Agenciji za državnu službu FBiH. Odluka o formiranju prodajne cijene nije prezentirana, a prema izjavi odgovorne osobe prodaja priručnika vršena po prodajnoj cijeni od 80 KM u 2009. godini. Prezentiran je Sporazum o distribuciji Priručnika za polaganje ispita općeg znanja za državne službenike u organima državne službe u FBiH kojim je dogovorena distribucija sa Agencijom za državnu službu FBiH, ali bez utvrđene cijene prodaje. Odluka o utvrđenoj visini cijene za prodaju priručnika u visini od 90 KM po jednom primjerku od 15.03.2010. godine, naknadno je dostavljena, a ista se primjenjuje od dana donošenja.

Nije prezentirana dokumentacija kojom bi se potvrdilo da je u skladu sa Pravilnikom o knjigovodstvu budžeta u FBiH i Uredbom o računovodstvu budžeta u FBiH izvršeno evidentiranje u glavnoj knjizi nabavke navedenih priručnika. Također, nije prezentirana dokumentacija o količini prodatih primjeraka, ostvarenom prihodu po osnovu prodaje istih, kao ni stanje zalihe priručnika na dan 31.12.2009. godine.

Potrebno je da Ministarstvo u okviru vršenja svoje nadležnosti – nadzora nad tijelima federalne uprave inicira donošenje i izdavanje potrebnih priručnika, a odabir autora vršiti u skladu sa prethodno donesenim procedurama i na transparentan način.

Potrebno je izvršiti uvid u dokumentaciju vezano za nabavku i prodaju Priručnika za polaganje ispita općeg znanja za državne službenike u organima državne službe, utvrditi zalihe istih na dan 31.12.2009. godine i u skladu sa konstatovanim poduzeti aktivnosti u skladu sa zakonskim i ostalim propisima.

Ugovori o djelu zaključivani su i za izvršenje drugih poslova za koje su Pravilnikom o unutrašnjoj organizaciji predviđena radna mjesta, a koji se odnose na obavljanje poslova i zadataka održavanja informatičke opreme (hardware i software), upravljanja računarskom mrežom Ministarstva kao i obavljanja srodnih poslova sukladno potrebama Ministarstva, za koje je po osnovu ugovorenog odnosa od 01.01. do 31.12.2009. godine isplaćen neto iznos od 10.450 KM (bruto iznos 12.341 KM). Izvršen je prijem zaposlenika od 01.06.2009. godine čime je popunjeno navedeno radno mjesto i nije bilo potrebe za dalje angažovanje druge osobe temeljem ugovora o djelu.

Iznos od 10.400 KM (bruto iznos 12.281 KM) isplaćen je po osnovu ugovorenog odnosa između Ministarstva i izvršioca za poslove rukovoditelja jedinice za implementaciju projekta Svjetske banke za zemljišno knjižnu administraciju u Federalnom ministarstvu pravde. Ugovor je zaključen po osnovu Odluke Vlade FBiH iz 2005. godine o osnivanju jedinice implementacije navedenog projekta, kojom je uređena obaveza Ministarstva da imenuje rukovoditelja jedinice iz reda uposlenih u Ministarstvu. Nije izvršeno imenovanje voditelja jedinice implementacije projekta od zaposlenih, odnosno ugovor je zaključen sa penzionisanim radnikom Ministarstva sa ugovorenom mjesečnom neto isplatom od 1.300 KM, što je za 8 mjeseci rada u 2009. godini isplaćen neto iznos od 10.400 KM na teret budžetskih sredstava.

Ugovore o djelu zaključivati za izvršenje onih poslova koji u skladu sa Pravilnikom o unutrašnjoj organizaciji nisu utvrđeni kao redovni poslovi i zadaci Ministarstva, a za izvršenje redovnih poslova provoditi procedure utvrđene Zakonom o državnoj službi u FBiH i Zakonom o namještenicima u organima državne službe u FBiH.

Naknade za rad u komisijama u toku 2009. godine evidentirane su u neto iznosu od 660.755 KM. Isplate su vršene po osnovu Rješenja o naknadama članovima komisija, a koja su se temeljila na osnovu rješenja o imenovanju članova komisija i izvještaja o radu komisija. Isplate naknada članovima komisija u najvećem dijelu se odnosi na članove u komisijama formirane po posebnim propisima kao što je Zakon o pravosudnom ispitu, Zakon o notarima, Zakon o vještacima, Zakon o pomilovanju i dr. Iz ostvarenih prihoda koje uplaćuju kandidati za polaganje ispita finansira se rad komisija, porezi, doprinosi i materijalni troškovi Ministarstva. Sa svim imenovanim članovima komisija i tehničkim osobljem sklopljeni su i ugovori o djelu. Obzirom da pravilnike o polaganju ispita i pravilnike o naknadama za rad u komisijama, na osnovu posebnih zakonskih i pod zakonskih propisa, donosi ovo Ministarstvo, smatramo da istim nije jasno definisan način i postupak imenovanja iz reda stručnjaka koji su se dokazali svojim naučnim i stručnim radom iz oblasti u koju se imenuju u cilju transparentnog izbora.

Potrebno je aktima koje donosi Ministarstvo na osnovu posebnih zakonskih i podzakonskih propisa, vezano za imenovanje članova komisija za polaganje ispita jasno definisati način i postupak izbora članova komisija iz reda stručnjaka koji su se dokazali svojim naučnim i stručnim radom iz oblasti u koju se imenuju.

Naknada za rad u komisiji za utvrđivanje prijedloga liste sudskih tumača isplaćena je od 142.161 KM. Komisija je formirana na osnovu Uredbe o stalnim sudskim tumačima prema kojoj komisiju imenuje ministar i istu čine predsjednik ispred Ministarstva i 2 člana iz reda profesora sa fakulteta. Uredbom je uređeno i pravo na naknadu članovima komisije tj. predsjedniku i članovima komisije dok istom nije obuhvaćeno pravo na naknadu tehničkom licu. Naprotiv, rješenjem o isplati naknade uređeno je pravo na naknadu i tajnicama komisije pozivajući se na odluku Vlade FBiH, iako se ista ne odnosi na komisije koje se formiraju za polaganje ispita na osnovu posebnih propisa. Ne možemo potvrditi osnovanost isplate

tehničkim licima u neto iznosu od 44.182 KM (po 11.046 KM za svaku od četiri tajnice povjerenstva). Također se ne može potvrditi ni opravdanost isplate naknada u neto iznosu od 9.495 KM tajnicama Komisije za utvrđivanje liste vještaka, a koje su imenovane rješenjem i utvrđena naknada za rad u komisiji (dvije tajnice) u visini 60% od iznosa prosječne mjesečne isplaćene neto plaće po zaposlenom u FBiH za protekli mjesec u odnosu na mjesec za koji se obračun naknade vrši, iako je Zakonom o vještacima utvrđeno da će administrativne poslove ove komisije obavljati Federalno ministarstvo pravde.

Isplatu naprijed navedenih naknada tehničkom osoblju koju čine uposlenici Ministarstva ne možemo potvrditi iz razloga što je Zakonom o vještacima predviđeno da administrativno tehničke poslove obavlja Ministarstvo, te je Pravilnikom o unutrašnjoj organizaciji Ministarstva bilo potrebno urediti izvršenje ovih poslova kroz opis poslova i zadataka radnih mjesta uposlenih.

Isplata naknade komisiji za izradu Zakona o državnoj službi iskazana je u iznosu od 12.323 KM. Smatramo da nije bilo osnova za formiranje komisije za izradu ovog zakona iz razloga što je u Pravilniku o unutrašnjoj organizaciji uređen Sektor za upravu čiji su poslovi pripremanje teza prednacrta i nacrt zakona i drugih propisa iz oblasti federalne uprave. Također u sektoru pravosuđa uređena su radna mjesta (rukovodilac sektora, stručni savjetnik za normativno - pravne poslove, viši stručni suradnik za normativno – pravne poslove) čiji opis poslova i zadataka obuhvata izradu prednacrta, odnosno izradu nacrt zakona i drugih propisa kao i pripremanje izmjena i dopuna tih zakona.

Ministarstvo – Zavod za javnu upravu u skladu sa Zakonom o federalnim ministarstvima i drugim tijelima federalne uprave u okviru svoje nadležnosti vrši izdavanje publikacija iz oblasti prava, te u okviru navedenog priprema i izdaje časopis „Pravna misao“. Prema prezentiranoj dokumentaciji konstatovano je da su troškovi izdavanja časopisa veći od ostvarenih prihoda za 35.037 KM. Ne može se potvrditi opravdanost navedenog imajući u vidu da se značajni dio poslova obavlja putem zaključivanja ugovora o djelu iako je Pravilnikom o unutrašnjoj organizaciji predviđeno radno mjesto stručnog saradnika za izdavačku djelatnost u Zavodu čiji poslovi i zadaci obuhvataju obradu dokumentacijskog materijala po utvrđenoj metodologiji i vrši poslove iz oblasti izdavaštva, priprema sjednice redakcije časopisa, priprema, tiskanje, distribuciju i ostale obaveze u vezi s izdavanjem.

Ističemo da su uposlenici Ministarstva po osnovu zaključenih ugovora o djelu, za rad u komisijama u toku 2009. godine ostvarili značajne naknade u iznosima od 18.753 KM, 32.138 KM, 33.400 KM (pomoćnik ministra i savjetnici), a također i pojedini državni službenici u iznosima od 7.119 KM i 13.619 KM.

Potrebno je da se administrativno tehnički poslovi za rad komisija za koje je nadležno Ministarstvo, kao i isplata naknada za obavljanje istih vrši u skladu sa zakonskim i ostalim propisima.

Potrebno je preispitati opravdanost formiranja komisija za obavljanje onih poslova koji su po aktima ministarstva predviđeni kao poslovi i zadaci uposlenih, u cilju izbjegavanja isplate dvostruke naknade i to naknade po osnovu izvršenja obaveza preuzetih rasporedom na to radno mjesto i naknade koja se ostvaruje izvršenjem tih poslova kroz komisiju.

5.5 Tekući transferi

Sredstva tekućih transfera izvršena su u iznosu od 698.090 KM, a odobrena u iznosu od 780.540 KM, što predstavlja izvršenje od 89,44 %, a čini ga transfer udruženjima građana od 611.200 KM i transfer neprofitnim organizacijama 88.690 KM. Budžetom za 2009. godinu su odobrena navedena sredstva iako ne postoji zakonski osnov za planiranje i realizaciju ovog transfera putem ovog Ministarstva.

Transfer udruženjima građana i drugim organizacijama izvršen je na osnovu odluke Vlade FBiH od 12.11.2009. godine o odobravanju izdvajanja sredstava iz Budžeta za finansiranje četiri kulturna društva Preporod, Napredak, Prosvjeta, La Benevolencija. Zakon o izvršenju budžeta za 2009. godinu nije uredio obavezu utroška ovih sredstava temeljem donesenih i usvojenih programa. Sredstva su realizirana 28.12.2009.godine temeljem navedene odluke i to Bošnjačkoj zajednici kulture Preporod 244.481 KM, Hrvatskom kulturnom društvu Napredak 183.361 KM, Srpskom prosvjetnom i kulturnom društvu Prosvjeta 122.239 KM i Jevrejskom kulturnom prosvjetnom i humanitarnom društvu La Benevolencija 61.119 KM. Istom odlukom uređena je obaveza Ministarstva da vrši kontrolu namjenskog utroška sredstava na temelju izvještaja od strane korisnika transfera. Prezentirani izvještaji o utrošku sredstava – transfera dostavljenih od strane korisnika ne pokazuju za koju namjenu su sredstva utrošena, a nije prezentirana dokumentacija kojom

bi se potvrdilo da je Ministarstvo izvršilo kontrolu u skladu sa naprijed navedenom odlukom. Ministarstvo je o utrošku ovih sredstava izvještavalo Federalno ministarstvo finansija.

Potrebno je da Ministarstvo u skladu sa Odlukom Vlade FBiH o odobravanju izdvajanja sredstava iz budžeta FBiH za 2009. godinu za finansiranje četiri kulturna društva izvrši kontrolu namjenskog utroška sredstava doznačenih u skladu sa navedenom odlukom.

5.6 Primjena Zakona o javnim nabavkama BiH

Budžetom za 2009. godinu odobreno je za nabavku opreme 200.000 KM. Planom nabavke Ministarstva od navedenog iznosa, za nabavku kompjuterske opreme predviđeno je 150.000 KM, a preostalih 50.000 KM za opremu za prenos podataka i glasa. Iako je Pravilnikom o javnim nabavkama Federalnog ministarstva pravde i kazneno popravnih zavoda uređeno da postupak nabavke ne može početi prije nego što se donese Plan nabavke za tekuću godinu s precizno utvrđenim vrstama i osnovnim obilježjima svakog od predmeta nabavke, prezentirani plan nabavke predstavlja samo finansijski plan Ministarstva, bez razrade po vrstama i obilježjima svakog predmeta koji se planira nabaviti, što je u suprotnost sa navedenim pravilnikom.

Nabavka kompjuterske opreme izvršena je u iznosu od 173.197 KM od čega je izvršena nabavka dijela opreme putem konkurentskog postupka u iznosu od 58.452 KM i putem otvorenog postupka 79.685 KM. Dio opreme u iznosu od 35.060 KM nabavljen je putem zaključivanja anexa ugovora za nabavke naknadne i nepredviđene opreme za projekat e-pisarnice i projekat registra poslovnih subjekata. Uvidom u realizaciju zaključenih ugovora utvrdili smo da isti nisu poštovani kada je u pitanju fakturisanje i plaćanje nabavljene opreme konkurentskim postupkom. Faktura je ispostavljena 17.11.2009. godine, a otpremnica ukazuje da je stvarna isporuka obavljena 23.11.2009. godine, što potvrđuje da je izvršeno fakturisanje na 6 dana prije isporuke opreme. Prezentirani pregled plaćanja ukazuje da je plaćanje izvršeno 26.11.2009. godine, što nije u skladu sa ugovorenim odnosom, obzirom da je izvršeno u roku od 3 dana po isporuci a ne 30 dana kako je ugovoreno. Zaključeni ugovor o isporuci kompjuterske opreme po osnovu otvorenog postupka takođe nije poštovan u dijelu roka plaćanja. Oprema je isporučena uz otpremnicu 29.12.2009. godine (faktura ispostavljena 30.12.2009. godine) a plaćanje je izvršeno odmah tj. 31.12.2009. godine, što nije u skladu sa ugovorenim rokom plaćanja od 100 dana od dana isporuke. Napominjemo da je za izbor najpovoljnijeg ponuđača rok plaćanja bio jedan od kriterija.

Obzirom da tenderskom dokumentacijom nije tražena garancija za ponudu i garancija za izvršenje ugovora, kako je to uređeno odredbama navedenog Pravilnika o javnim nabavkama Federalnog ministarstva pravde i kazneno popravnih zavoda, Ministarstvo se nije zaštitilo od eventualnih rizika, izuzev što je ugovoreno da će se eventualni sporovi rješavati sporazumno, a u suprotnom pred nadležnim sudom.

Zbog naprijed navedenog ne može se potvrditi da je nabavka dijela kompjuterske opreme u iznosu od 93.512 KM izvršena u skladu sa članom 10. Zakona o javnim nabavkama BiH u dijelu provođenja odgovarajućeg postupka za dodjelu ugovora. Također, se ne može potvrditi opravdanost plaćanja nabavljene kompjuterske opreme u iznosu od 138.137 KM iz razloga što je isplata izvršena prije ugovorenog roka, a isti je bio jedan od kriterija za izbor najpovoljnijeg ponuđača.

Postupak nabavke opreme vršiti u skladu sa Zakonom o javnim nabavkama BiH u dijelu izbora odgovarajućeg postupka za dodjelu ugovora. Također potrebno je da se plaćanje nabavljene opreme vrši u skladu sa zaključenim ugovorima, koji su u skladu sa uslovima utvrđenim u tenderskoj dokumentaciji.

Plan nabavke sačinjavati u skladu sa Pravilnikom o javnim nabavkama Federalnog ministarstva pravde i kazneno popravnih zavoda, sa precizno utvrđenim vrstama i osnovnim obilježjima svakog od predmeta nabavke i plaćanje nabavke vršiti u skladu sa ugovorenim odnosom. Štititi interese ministarstva pribavljanjem garancije za ponudu i garancije za izvršenje ugovora od strane odabranog ponuđača.

5.7 Razvojni projekti

Iako je u skladu sa Planom razvojnih projekata u Federaciji BiH za 2009. godinu, Ministarstvo u skladu sa Uredbom o uspostavi koordinacionog mehanizma za upravljanje i koordiniranje sredstava za razvoj u

FBiH i Odlukom o osnivanju Jedinice za implementaciju Projekta Svjetske banke za zemljišno - knjižnu administraciju bilo dužno osnovati organizacionu jedinicu kao organizacioni odjel, sektor, grupu ili drugi oblik organizovanja u okviru Ministarstva što Pravilnik o unutrašnjoj organizaciji to ne potvrđuje. Također, obaveza Ministarstva je bila da organizacionu jedinicu popuni iz reda postojećih službenika iz Ministarstva, a broj službenika je trebao utvrditi Pravilnikom o unutrašnjoj organizaciji, što istim nije uređeno.

Ministarstvo je imenovalo rukovoditelja ove Jedinice 19.12.2005. godine. U međuvremenu je imenovana osoba otišla u penziju, a njen angažman u 2009. godini nastavljen je vršenjem po osnovu zaključenih ugovora o djelu do augusta 2009. godine, a od septembra imenuje se drugi rukovoditelj jedinice koji također nema status uposlenika u Ministarstvu, što nije u skladu sa naprijed navedenom Odlukom i uredbom. Isplata naknade za rad novo imenovanog rukovoditelja jedinice vršena je na teret sredstava odobrenih za realizaciju navedenog projekta. Prezentiran izvještaj za IV kvartal 2009. godine nije potpisan od rukovoditelja jedinice.

Potrebno je unutar Ministarstva organizovati Jedinicu za implementaciju projekata Svjetske banke i imenovati osobu uposlenu u Ministarstvu da upravlja istom u skladu sa Uredbom o dopuni Uredbe o uspostavi koordinacionog mehanizma za upravljanje i koordiniranje sredstava za razvoj u FBiH i Odlukom o osnivanju Jedinice za implementaciju Projekta Svjetske banke za zemljišno - knjižnu administraciju u Federalnom ministarstvu pravde.

6. KOMENTAR

U ostavljenom roku Federalno ministarstvo pravde (dopisom broj 06-49-1923/10) se očitovalo na dostavljeni Nacrt izvještaja o izvršenoj reviziji finansijskih izvještaja za 2009. godinu. U navedenom očitovanju su date primjedbe na kvalifikacije navedene u revizorskom mišljenju. Primjedbe nisu prihvaćene iz razloga što nije dato adekvatno obrazloženje i priložena relevantna dokumentacija koja bi utjecala na izmjenu datih kvalifikacija. Pojašnjenje o razlogu neprihvatanja dato je u Pismu dostavljeno menadžmentu uz konačan Izvještaj o reviziji finansijskih izvještaja za 2009. godinu.

Rukovodilac sektora za finansijsku reviziju:
Munib Ovčina, dipl. oec.

Vođa tima:

Hajra Imširović, dipl. iur.

Član tima:

Mirko Mišić, dipl. oec.

Član tima:

Sabina Avdić, dipl. oec.

Prilog br. 1.
Izvršenje budžeta Federalnog ministarstva pravde na dan 31.12.2009. godine
u KM

Red. Br.	Vrsta rashoda	Budžet za 2009. godinu	Izmjene i dopune budžeta za 2009. godinu ¹	Tekuća rezerva u 2009. godini ²	Zakonska preraspodjela sredstava	Operativni budžet za 2009. godinu ³ (=4 do 6)	Izvršenje budžeta za 2009. godinu	Izvršenje Budžeta za 2008. godinu
1	2	3	4	5	6	7	8	9
I	Tekući izdaci	2.223.554	3.171.369			3.171.369	2.593.722	2.376.967
1.	Bruto plate zaposlenih	730.968	1.191.122			1.191.122	1.059.056	859.936
2.	Naknade troškova zaposlenih	196.864	311.574			311.574	264.176	316.584
3.	Doprinosi poslodavca	84.747	149.262			149.262	113.537	96.034
4.	Putni troškovi	62.457	37.918			37.918	32.492	38.626
5.	Izdaci za komunalne usluge	38.411	73.699			73.699	47.993	56.717
6.	Nabavka materijala	46.708	46.708			46.708	45.696	51.231
7.	Izdaci za usluge prevoza igoriva	30.729	18.961			18.961	16.300	15.162
8.	Unajmljivanje imovine i opreme	6.145	6.145			6.145	3.317	7.917
9.	Izdaci za tekuće održavanje	119.075	73.468			73.468	26.749	66.277
10.	Osiguranje i bankarske usluge	8.450	7.212			7.212	6.726	6.055
11.	Ugovorene usluge	900.000	1.255.300			1.255.300	977.680	862.428
II	Tekući grantovi	800.000	780.540			780.540	698.090	1.305.128
1.	Isplata Komisiji za rješavanje zahtjeva za odštetu SFOR-u	-						19.803
2.	Naknada štete pričinjene SFOR-u	-						112.325
3.	Grantovi neprofitnim organizacijama		169.340			169.340	86.890	
4.	Transfer udruženjima građana i drugim organizacijama	-						373.000
5.	Transfer za kulturno društvo "Preporod"	320.000	244.481			244.481	244.481	320.000
6.	Transfer za kulturno društvo "Napredak"	240.000	183.361			183.361	183.361	240.000
7.	Transfer za kulturno društvo "Prosvjeta"	160.000	122.239			122.239	122.239	160.000
8.	Transfer za kulturno društvo "Benovolencija"	80.000	61.119			61.119	61.119	80.000
III	Kapitalni izdaci	200.000	200.000			200.000	182.804	93.403
1.	Nabavka opreme	200.000	200.000			200.000	182.804	93.403
A	Ukupno rashodi i izdaci (I+II+III)	3.223.554	4.151.909			4.151.909	3.474.616	3.775.498
B	Neraspoređeni višak prihoda i rashoda⁴		181.357					
A+B	UKUPNO ODOBRENA SREDSTVA	3.223.554	4.333.266			4.151.909	3.474.616	3.775.498
	BROJ ZAPOSLENIH	48	44			44	41	41

¹ Zakon o izmjenama i dopunama budžeta Federacije Bosne i Hercegovine za 2009. godinu („Sl. novine FBiH“ broj 81/09)

² Sredstva tekuće rezerve Vlade FBiH odobrena su u iznosu 1.131.940 KM i ista su obuhvaćena izmjenama i dopunama Budžeta Federacije Bosne i Hercegovine za 2009. godinu

³ Ukupno odobreni operativni budžet za 2009. godinu

⁴ Odobrenim sredstvima na poziciji „Neraspoređeni višak prihoda i rashoda“ u iznosu od 181.357 KM Ministarstvo nije raspolagalo a ista su realizovana od strane Federalnog ministarstva finansija.